

Date – 11/06/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- Bairabi leh Sairang inkar relkawng phah zawh anih hnuah tlan thei turin engkim peihfel a ni tawh a, a tlan tan hun tur sorkar laipuiin a ruat thuai beisei a ni.
- Environment Forests & Climate Change Minister Pu Lalthansanga'n Mizoram mipuite chu Green Mizoram Day thupui "Ruahtui khawl nan thing i phun ang u" tih pualin thingphun te ziktlua tak a enkawl turin a chah.
- Prime Minister Narendra Modia chuan Pakistan thlawpa firfiakte chetdan khawvel hriata puandarh tura tirh parliamentary delegate team 7 te chu nimin khan a kawm.
- Indian Air Force group captain Shubhanshu Shukla chuan India mi zinga a hmasa ber turin vawiin hian SpaceX Axiom-4 mission hmangin International Space Station a tlawh dawn .

<><><>

11 YEARS OF NDA GOVT - RAILWAY

Bairabi leh Sairang inkar relkawng phah zawh anih hnuah tlan thei turin engkim peihfel a ni tawh a, a tlan tan hun tur sorkar laipuiin a ruat thuai beisei a ni.

An endiktu Commissioner of Railway Safety (CRS) Pu Sumeet Singhal chuan Hortoki leh Sairang inkar relkawng phah bik endik hna nimin khan zovin km 33.864 a thui a ni a, hemi hma hian Bairabi leh Hortoki inkar bik a lo endik tawh a, Northeast Frontier Railways CPRO Kripanjal Kishore Sharma-a chuan tun dinhmunah relkawng hawn theih turin peihfel a ni tih kan corr a hrih a ni.

Tun thla ni 6 atanga an endik, Sairang leh Hortoki inkara rel kawng hi kilometre 51.38 a thui a ni a, mihring leh bungraw phur rel Mizoram a lut hian state sum leh pai dinhmun mai bakah mihring leh bungraw kal kual vel a ti danglam dawrh dawn ni a hriat a ni a, Mizoram chu ramchhunga rel inthlunzawm zingah a hming a chuang ve tawh dawn a ni.

Akashvani News-in Sairanga cheng mithenkhat a kawm kual chuan rel lo lut tur chu lawmawm an tih thu an sawi a, tunah pawh rel kawng leh station-ah inhlawhfakna tur te an neih phah tawh a, rel a lo luh hunah phei chuan chawhmeh a

tlawm tawh dawn nia an hriat avangin an phur hle tih an sawi a. Sairang Branch YMA President Pu Vanlalmuana chuan rel lo lut tur chu Sairang mipuite an lawm hle tih sawiin, Mizoram pum huap pawhin bung thar a ni a, changkanna rahbi zawh tanna hun pawimawh tak ni-a an hriat thu a sawi bawk a ni.

Sairang YMA Adviser, Area MUP President ni bawk Pu B. Lalrinthanga pawhin rel lo lut chu thil tha tak leh ram hmawsawna turah an ngaih thu a sawi a ni.

Northeast Frontier Railway (NFR) siam Bairabi–Sairang New Line rel kawng hi kilometre 51.38 a thui a ni a, section 4-ah then niin, Bairabi–Hortoki km 16.72 a thui, Hortoki–Kawnpui km 9.71 a thui, Kawnpui–Mualkhang km 12.11 a thui leh Mualkhang–Sairang km 12.84 a thui a ni a, leiverh 48, lei lian 55, lei te 87, Road Over Bridges 5 leh Road Under Bridges 6 a awm bawk a ni.

<><><>

TERRITORIAL ARMY

Indian Army hnuaiah Mizo hlang awmna, Mizo Territorial Army Battalion (Home & Hearth) din a ni dawn a, thla thar, July thla atang hian district hrang hrangahte Territorial Army a tang tur lak tan a ni dawn.

Mizoram sorkar hnuaia Coordination & Land Search Committee, Chairman, Lt. Col. Clement Lalhmingthanga MLA chuan nimin khan Aizawl Press Club-ah thuthar thehdarhtute kawmin, tun dinhmunah Mizorama Territorial Army (TA)-ah hian mipa chauh lak an ni rih dawn a, kum 18 atanga kum 42 inkar mipa Mizorama piang leh seilian an ni ngei tih finfiahna lehkha pawimawh an neih a ngai dawn a ni a ti.

Ruahman lawk ang chuan TA a tang tur lakluhna hi June ni 14 atanga tan tur ni mah se, ruahsur nasa leh harsatna dangte avangin thla thar, July thlaah sawn a ni a, Aizawl district-ah TA a tang tur lakluhna hi neih hmasak ber tur a ni a, July ni 26-ah neih a ni dawn a ni.

July ni 27-ah Champhai leh Siaha district-ah, July ni 28-ah Mamit leh Serchhip district-ah, July ni 29-ah Kolasib leh Khawzawlah, July ni 30-ah Lunglei leh Lawngtlaiah, July ni 31-ah Saitual leh Hnahthialah te neih a ni dawn a, August ni 1 leh ni 2 chu Reserve day atan an dah bawk a, written test paltlang te chu medical test neih pui leh an ni dawn a, chumi paltlang te chu November thla tirah Shillong-a Assam regiment training centre-ah thla 6 vel training tura ruahman a ni.

Mizorama Territorial Army bul tan nan hian Company pahnih a awm dawn a, company pakhat-ah officer pakhat leh Junior Commissioned Officer, JCO pali, bakah Other range-92, an vaiin mi 102 an awm dawn a, officer dil hun chhung chu wawiin khan a tawp tawh a, Mizo tan bik ni lovin ram pum huapin a dil theih a, officer 19, hmeichhe pakhat leh mipa 18 lak an ni dawn a, July ni 20-ah exam buatsaih a ni dawn a, other range dil tur te tan pawl 10 pass nih a ngai thung a ni.

Tun dinhmunah Mizo Territorial Army Battalion te awmna tur hmun nghet chungchangah thutlukna siam a la ni lo a ni.

<><><>

Environment Forests & Climate Change Minister Pu Lalthansanga'n Mizoram mipuite chu Green Mizoram Day thupui "Ruahtui khawl nan thing i phun ang u" tih pualin thingphun te ziktluak taka enkawl turin a chah.

Vawiin-Green Mizoram Day puala Mizoram mipuite thuchah a sawiah Pu Lalthansanga chuan Green Mizoram Day chu duhthusamin tipuitling thei lo mah se, a hlawhtlinna tam tak hmuh tur a awm a ti a, zin veivak thin te chuan rilru ti thlamuang tham kawngsirah thingkung hmuh tur an neih a rin thu a sawi a ni.

Minister Pu Lalthansanga chuan Green Mizoram Day kaltlang hian kum 1999 atanga kum 2014 thleng khan thing tiak nuai 46, sing 8, 338 phun a ni tawh tih sawiin, Forest survey report 2023-a a lan danin, Mizoramah a ram zau zawng atanga tehin zaa 85.34 chu ramhnuaiin khuh mahse tan lak a la ngai hle tih a sawi a, nakin zela chhuanthar lo awm tur te tan ramngaw siam leh venhim kawngah te, nungcha leh thing chi hrang hrang humhalh kawngah te tlawmngai pawl, kohhran leh zirna in hrang hrangte tiamin mipuite chu hmalakpui turin a sawm a ni.

<><><>

11 YEARS OF MODI GOVERNMENT – STATEWIDE PRESS CONF

BJP National Secretary Pu Anil Antony-a'n kum 2014-a Prime Minister Narendra Modi-a'n, 'Mi tin tan an mamawh ang hmasawnna thlen' tih thupui a neih bawhzuiin sorkar laipui scheme hrang hrang chu khaw tina mi rethei zawkte hamthatna tur leh zahawmna turin a taka kalpui mek a ni a ti.

He thu hi nimina Aizawl Press Club-a thuthar thehadarhtute hnenah kum 11 chhunga Prime Minister Pu Narendra Modi kaihhruai Sorkar hmalakna hrang hrangte a puangzarnaah a sawi a, Pu Anil Antony chuan BJP kaihhruai sorkar laipui chuan hmasawnna chu a thupui ber a ni tih sawiin, Sorkar laipui scheme hrang hrang- Pradhan Mantri Awas Yojana emaw, Jal Jeevan Mission emaw, Ujjwala Yojana emaw te chu khaw tina mi rethei zawkte hamthatna tur leh zahawmna tur a siam a ni a, an tana thil pawimawh tak tak dawn theihna tur leh tih hlawhtlinna tur a ni a, a taka kalpui mek zel a ni a ti. Pu Anil Antony chuan kawngpui tha leh zau tak hmanga khaw hrang hrang inkalpawhna te, in tinah kawlpheha awm theihna tur te, in chhunga tui thianghlim herh hawna tur pek te, Digital India hmanga thalaite tih hmasawnna te chu chu Pu Modi-a sorkar thil ngaih pawimawh ber a ni reng a ni a ti a. Prime Minister Modi-a hmathlir chu a takah chantir a ni mek zel a ni a ti.

BJP National Secretary Pu Anil Antony chuan sorkar laipui hmalakna Pradhan Mantri Garib Kalyan Anna Yojana kaltlangin mi nuai 81 chuang hnenah 'ration' ei tur chi hrang hrang a thlawna pek an ni a, Ayushman Bharat Yojana hnuaiah mi nuai tam tak hnenah a thlawna damdawi ina inenkawlna pek a ni bawk a ti a, Swachh Bharat Mission kaltlangin khaw hrang hrangte chu hmun thianghlim zawkah leh hrisel zawkah chantir mek a ni bawk a, Jan Dhan account nuai 55 chuang hawn a nih bakah, Garib Kalyan Anna Yojana kaltlangin chhungkaw nuai 81-in a thlawnin buhfai an dawng bawk tih sawiin, sorkar chuan hmeichhiate zahawmna humhim sak leh an hnathawh tur dapsak te chu a ngai pawimawh hle a ti bawk.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM- NDA

Prime Minister Narendra Modia chuan Pakistan thlawpa firfiakte chetdan khawvel hriata puandarh tura tirh parliamentary delegate team 7 te chu nimin khan a kawm. He inkawmhona hi Prime Minister chenna inah neih niin Union Parliamentary Minister Kiren Rijiju, DMK MP Kanimozhi, BJP MP Ravi Shankar Prasad, Anurag Singh Thakur, Bansuri Swaraj, Nishikant Dubey, Congress MP Shashi Tharoor leh Manish Tewari te pawh an tel a ni.

Party tin aiawh palaite hian ram 33 an tlawh hman a. Heng an ram tlawhnaah hian Pakistan in firfiakte a thlawp ruk dan chungchang bakah Operation Sindoor chungchang an sawi a ni.

<><><>

INDIAN @ ISS

Indian astronaut leh Air Force group captain Shubhanshu Shukla chuan India mi zinga a hmasa ber turin vawiin hian SpaceX Axiom-4 mission hmangin International Space Station a tlawh dawn. Nimin khan he mission hi neih tura ruahman ni mahse khaw chhia avangin sawn tlai a ni a. Indian Space Research Organisation (ISRO) Chairman Dr.V. Narayanan sawidanin vawiin tlai dar 5.30 ah an thlawk chhuak dawn a ni. Video hmanga a thuchahah Group Captain Shubhanshu Shukla chuan Axiom-4 mission a a tel tur chu lawmawm atih thu a sawi. He mission-ah hian astronaut pali kahchhuah an ni dawn a. United States-a Florida atangin an thlawk chhuak ang.

<><><>

NDA @11 YEARS NE

Ralthuam siamchhuah lamah kum 11 kalta chhungin ramchhungah nasa takin hmasawнна a thleng a. Kum 2016-a surgical strike atangin kumin 2025-a Operation Sindoor ah te India chuan a ram himna ti derthawng theite lakah a chet dan tur a ti Chiang Hle a. Tumbik nei takin firfiakte inkulhna hmun pakua kahchhiat a ni a. Hetah hian ramchhunga siam ralthuamte an tangkaiin thil an ti thei hle a ni. Ramchhuna siam INS Vikrant lawng liante, Light COmbat Helicopter thlengin ramchhunga siam chhuahte chhuang taka hman an ni. Hei bakah hian ramchhunga ralthuam ramdanga thawn zat pawh pungin cheng

vaibelchhe sing 2 sang 3 leh 622 hu thawnychhuah a ni a. Kum 2014 nen
tekhinin a let 34 in a pung a ni.

<><><>